

Blagèèri



e VSG Bangg

Mit zwai so Type i waiss nitt wies soll goo
Dii ganzi Fasnacht uff dr Biihni stoo
Dä hett e fuule Maage und loot ain faahre
Dä am Helge het ständig e Faahne
So goot das nit jede macht Giggs und Gäggs
Mir wysse doch alli nume Zämme Fäggs

D Usschaffigsinitiative goot esoo
Wenn als Uusländer nährsch muesch d Schwiiz verloo
Gauner Raser und au Ladedieb
Fliege uuse so ischs uns Schwiizer lieb
E grossi Schnuure macht nytt de blibsch halt doo
Sunscht miesste ja alli Schwoobe goo

Alli Fraue stehn uff und hebe d'Händ in d'Hechi
Umarme sie jetzt die nägscht in dr nechi
Liipfe si nach hinte s'rächte Bai
Passe si uff das si nit keiie wie ne Stai
Liebi Männer ihr gseent wie das goot
So styre mir d'Fraue au im Bundesroot

Mi Alti dehai het e Fitnesswahn
Si stoot in dr Stube wie dr stärbendi Schwan
Sii bhauptet s isch guet fyr dr inneri Friide
Wenn ich nit mitmach sin mir bald gschiide
Das kunnt nit vo däre Spiilkonsole
Das hett im Färnseh dr Mike Shiva empfohle

Du dert vorne mit deere hybsche Frau
Sie het yber dii gsait sigsch e aittle Pfau
Sie mit de blond Hoor genau dert ähne
Dä näbe ihne sait sie sind zum gähne
Du maintsch das daas glooge sygg
Mir wisse das nämmlig uss em Wickileak

Zem Sarkosy do keert halt d Carla Bruni
Zum Wänger Kilian keert e scheene Muni
Uff d Schwarzwaldbrugg keert e Laschwagestau
Zer Roche keert ändlige e naie Verwaltungsbau
Zu Ghacktem mit Hörnli isst me Öpfelmuues
Un d'Calmy-Rey keert uss em Bundeshuus

Was isch gloffe wän mir vo dr Regierig wisse
Dr Wessels sait stoolz „alli Strosse uufgrisse“
S'Budget maint d Eva isch jetzt putzt und gsträält
ich ha mi z'Bärn beworbe nume hänn s mi nit gewäält
Ehh "Nyyt" staggelet der Morin aber s guete draa sygg
vo ihm stoot kai Wort im Wickileak

Das Theater mit em Theater isch e Theater
Lieschtel und Baasel hänn sunscht no Theater
Sigs bi dr Schuel mit Strosse oder Trämmli kaufe
S'maint jede wie är's macht miessis laufe
Jetzt gohts aber vorwärts zwische Stadt und Land
Sie stehn zämme und schaffe Hand in Hand

Wie schuttet die Schwiizer Nati guet
mit Spielwitz Technik Biss und Muet
Si Dribble ,si Pässle ,si Schleen Högge, kenne Finte
Si überlaufe d Abwehr si dien Penalty schinde
Wie wär das Scheen ei einzigs mool
Dr Inler und dr Frei mache dr Ball ins Gool

Z Tunis sind sie uf d'Stroos dr Ben Ali het miesse goo
em Mubarak z'Ägypte goots au esoo
Die Alte Kneechen kenne nimmi länger bliibe
Dr Drugg vo dr Stroos het si andlig vertriibe
Mir frooge uns wie lang mir uff dr'Strooss mien bliibe
Zum dr Morin uss em Roothuus z vertriibe

Dr Wättermacher Kaachelmaa
Stoobt vor Gricht will är soll glooge haa
Är hett schintz ganz ungeniert
Mit falsche Verspreche Fraue verfiehrt
Für das uusezfinde bruuche mir kai Gricht
S isch alles Glooge wie im Wetterbricht

Wottsch au by uns bänggle ?

Schigg doch aifach e Brief in unser Boschtfach

VSG Postfach 4365 4002 Basel

Oder goosch uff, www.vsg-basel.ch
